



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

24 հուլիսի 2025 թվականի N 999 -Ա

ԱՆՇԱՐԺ ԳՈՒՅՔ ՀԵՏ ՎԵՐՑՆԵԼՈՒ ԵՎ ԱՆՀԱՏՈՒՅՑ
ՕԳՏԱԳՈՐԾՄԱՆ ԻՐԱՎՈՒՆՔՈՎ ՀԱՆՁՆԵԼՈՒ
Մ Ա Ս Ի Ն

Հիմք ընդունելով Հայաստանի Հանրապետության քաղաքացիական օրենսգրքի 688-րդ հոդվածը, «Պետական ոչ առևտրային կազմակերպությունների մասին» օրենքի 5-րդ հոդվածի 2-րդ մասը, «Պետություն-մասնավոր գործընկերության մասին» օրենքի 18-րդ հոդվածի 1-ին մասը և 26-րդ հոդվածի 1-ին կետի 3-րդ մասը՝ Հայաստանի Հանրապետության կառավարությունը **ո ր ո շ ու մ է.**

1. Հայաստանի Հանրապետության ներքին գործերի նախարարությանն ամրացված՝ Հայաստանի Հանրապետություն, քաղ. Երևան, Դավթաշեն, Անաստաս Միկոյան փողոց 109/8 (երրորդ մասնաշենք) հասցեում գտնվող շենքի 1-ին հարկից 964.34 քառ. մետր և շենքի 2-րդ հարկից 760.65 քառ. մետր մակերեսով տարածքը (2022 թվականի հունիսի 6-ին գրանցված սեփականության իրավունքի գրանցման վկայական N 06062022-01-0194, այսուհետ՝ գույք) 10 տարի ժամկետով՝ անհատույց օգտագործման իրավունքով հանձնել «ՀԱՅՓԱՍ» փակ բաժնետիրական ընկերությանը (Արդարադատության նախարարության իրավաբանական անձանց պետական ռեգիստրում 271.120.1453144 գրանցման համարի ներքո, իրավաբանական հասցեն - Հայաստանի Հանրապետություն, քաղ. Երևան, Զվարթնոց

միջազգային օդանավակայան, վարչական շենք 2, 0042) (այսուհետ՝ ընկերություն) Հայաստանի Հանրապետության կառավարության 2023 թվականի դեկտեմբերի 28-ի N 2346-Ա որոշման հիման վրա 2025 թվականի ապրիլի 25-ին կնքված պետություն-մասնավոր գործընկերության պայմանագրով (այսուհետ՝ ՊՄԳ պայմանագիր) նախատեսված աշխատանքների իրականացման նպատակով:

2. Հայաստանի Հանրապետության տարածքային կառավարման և ենթակառուցվածքների նախարարության պետական գույքի կառավարման կոմիտեի (այսուհետ՝ կոմիտե) նախագահին՝

1) սույն որոշումն ուժի մեջ մտնելուց հետո՝ 15-օրյա ժամկետում, լուծել «Տեխնիկական անվտանգության ազգային կենտրոն» պետական ոչ առևտրային կազմակերպության (այսուհետ՝ կազմակերպություն) հետ Հայաստանի Հանրապետության կառավարության 2022 թվականի հուլիսի 7-ի «Անհատույց օգտագործման իրավունքով տարածք ամրացնելու մասին» N 1020-Ա որոշման հիման վրա 02.08.2022 թ. կնքված պետական սեփականություն հանդիսացող անշարժ գույքի անհատույց օգտագործման N 31/0022 պայմանագիրը և դրա հիման վրա իրավունքի պետական գրանցում ստացած գույքային իրավունքի դադարման պետական գրանցում իրականացնելու նպատակով օրենսդրությամբ սահմանված կարգով դիմել Կադաստրի կոմիտե, միաժամանակ նախատեսելով, որ պայմանագրի լուծման և պայմանագրից ծագող գույքային իրավունքների դադարման հետ կապված ծախսերն իրականացվելու են կազմակերպության միջոցների հաշվին:

2) սույն կետի 1-ին ենթակետում նշված աշխատանքների ավարտից հետո՝ մեկամսյա ժամկետում, ընկերության հետ կնքել սույն որոշման 1-ին կետում նշված անշարժ գույքի անհատույց օգտագործման պայմանագիր (այսուհետ՝ պայմանագիր)՝ դրանում նախատեսելով, որ՝

ա. ընկերությունը պարտավոր է պայմանագիրն ուժի մեջ մտնելուց հետո իր միջոցների հաշվին իրականացնել գույքի պահպանման ծախսերը (կոմունալ ծախսեր և այլ վճարումներ), ինչպես նաև իրականացնել բարելավումներ և գույքն օգտագործել ՊՄԳ պայմանագրին համապատասխան,

բ. անհատույց օգտագործման տրամադրված գույքը կամ դրա մասն օգտագործողի կողմից որևէ գույքային իրավունքով չի կարող տրամադրվել այլ անձի,

գ. պայմանագիրը դադարում է և դրա հիման վրա իրավունքի պետական գրանցում ստացած գույքային իրավունքի դադարման պետական գրանցումն իրականացվում է «Գույքի նկատմամբ իրավունքների պետական գրանցման մասին» օրենքի 35-րդ հոդվածի պահանջների համաձայն ՊՄԳ պայմանագրի դադարման դեպքում,

դ. ծրագրի շրջանակներում կատարված բաժանելի և անբաժանելի բարելավումները վերադարձման, իսկ դրանց արժեքները հատուցման ենթակա չեն,

ե. պայմանագրի նոտարական վավերացման և պայմանագրից ծագող գույքային իրավունքների պետական գրանցման ծախսերը ենթակա են իրականացման ընկերության միջոցների հաշվին:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՓՈԽՎԱՐՉԱԴԵՏ

Տ. ԽԱՉԱՏՐՅԱՆ

Երևան